

Y Bwrdd Rheoli Management Board

**Cofnodion y cyfarfod a gynhaliwyd ar 27 Ionawr
2014**

13.30 - 15.00, Ystafell Gynadledda 4B

Yn bresennol:

Claire Clancy (Prif Weithredwr a Chlerc) (Cadeirydd)

Adrian Crompton (Cyfarwyddwr Busnes y Cynulliad)

Anna Daniel (Pennaeth Trawsnewid Strategol)

Elisabeth Jones (Cyfarwyddwr y Gwasanaethau Cyfreithiol)

Steven O'Donoghue (Pennaeth Adnoddau'r Cynulliad)

Mair Parry-Jones (Pennaeth y Gwasanaeth Cyfieithu a Chofnodi)

Kathryn Potter (Pennaeth y Gwasanaeth Ymchwil)

Gareth Price (Pennaeth Cyfathrebu Dros Dro)

Mike Snook (Pennaeth Pobl a Lleoedd)

**Craig Stephenson (Pennaeth y Gwasanaeth Cymorth i'r Comisiwn
ac i'r Aelodau)**

Dave Tosh (Cyfarwyddwr TGCh)

**Chris Warner (Pennaeth Gwasanaeth y Pwyllgorau Polisi a
Deddfwriaeth)**

Sian Wilkins, (Pennaeth Gwasanaeth y Siambr a Phwyllgorau)

**Abigail Philips (Rheolwr y Rhaglen Trawsnewid Strategol) - *ar
gyfer eitem 1***

**Alison Rutherford (Rheolwr Llywodraethu Gwybodaeth) - *ar gyfer
eitem 4***

Liz Jardine (Ysgrifenyddiaeth)

1.0 Cyflwyniadau ac ymddiheuriadau

1.1 Ni chafwyd ymddiheuriadau.

1.2 Nid oedd buddiannau i'w datgan.

2.0 Cyfathrebu â staff

**2.1 Cytunodd Sian Wilkins i ddrafftio nodyn ar drafodaethau'r
Bwrdd Rheoli ar gyfer y dudalen newyddion.**

3.0 Cofnodion y cyfarfod a gynhaliwyd ar 16 Ionawr 2014

3.1 Cytunwyd bod y cofnodion yn gywir.

4.0 Strategaeth y Cynulliad ar Ymgysylltu â Phobl Ifanc ar gyfer y dyfodol

4.1 Croesawyd Abigail Philips i'r cyfarfod i gyflwyno dogfen, gyda Chris Warner, sy'n amlinellu gweledigaeth ar gyfer ymgysylltu â phobl ifanc drwy'r Cynulliad ar gyfer y dyfodol. Datblygwyd y strategaeth ar ôl cynnal yr ymgynghoriad ym mis Tachwedd, gyda chynghor gan y Grŵp Llywio, sy'n cynnwys rhanddeiliaid allanol, a sefydlwyd i lywio'r broses ymgynghori a'r argymhellion dilynol.

4.2 Roedd yr adborth yn sgîl yr ymgynghoriad yn awgrymu y byddai integreiddio ymgysylltiad â phobl ifanc yng ngweithgareddau'r Cynulliad yn fwy effeithiol na senedd pobl ifanc ar gyfer galluogi ac annog ymgysylltiad eang â phobl ifanc ar bynciau y maent yn frwdfrydig yn eu cylch ac sy'n effeithio arnynt. Hefyd roedd cysylltiad amlwg rhwng gwybodaeth am y Cynulliad ac ymgysylltu â'r Cynulliad.

4.3 Bu'r Bwrdd yn trafod cwmpas y weledigaeth, yr effaith a'r heriau o ran darparu'r hyn sy'n gynllun uchelgeisiol, a'r angen i ymgorffori'r dyheadau yn arferion y sefydliad a gweithgareddau'r Cynulliad, drwy lunio cynllun gweithredu realistig a fyddai'n sicrhau y gwelir cynnydd dros y ddwy flynedd sy'n weddill o'r Pedwerydd Cynulliad.

4.4 Argymhellodd y Bwrdd y dylid cadarnhau'r negeseuon allweddol, a'r adnoddau a'r sgiliau sy'n angenrheidiol i ddarparu'r canlyniadau arfaethedig. Dylid tynnu sylw'r Comisiwn hefyd at yr adroddiad ar yr ymgynghoriad, fel llinell sylfaen effeithiol ar gyfer mesur llwyddiant y gellir ei gymharu yn y dyfodol.

4.5 Byddwn yn gofyn am gytundeb gan y Comisiwn yn eu cyfarfod ar 13 Chwefror ar y weledigaeth, y blaenoriaethau o ran y prif gyfleoedd a'r gweithredoedd, ac ar y cynigion ar gyfer cynllun gweithredu manwl a digwyddiad lansio ffurfiol.

5.0 Strategaeth Cyllideb 2015-16

- 5.1 Roedd proses y gyllideb flynyddol wedi dechrau, a chyflwynodd Steven O'Donoghue y dull gweithredu a awgrymir o ran cyllideb y Comisiwn yn 2015-16, sef blwyddyn derfynol y Pedwerydd Cynulliad a'r blynyddoedd ariannol dilynol. Roedd hyn yn dilyn tair blynedd o fuddsoddi a gynlluniwyd i wella capasiti gwasanaethau'r Cynulliad er mwyn cyflawni nodau'r Comisiwn. Byddai cyllideb 2015-16 yn unol â bloc Cymru, ac yn aros yn gyson ag ef, a fyddai'n golygu gostyngiad mewn termau real. Fodd bynnag, mae'r rhaglen fuddsoddi a'r rhaglen Gwerth am Arian a sefydlwyd dros y tair blynedd ddiwethaf wedi galluogi'n hymrwymiad i ansawdd y cymorth a'r gwasanaethau a ddarperir ar gyfer y Cynulliad i barhau.
- 5.2 Bu'r Bwrdd Rheoli yn adolygu'r prif faterion a oedd yn debygol o effeithio ar y strategaeth, ac roedd yn argymhell y dylid ceisio cael eglurhad ar y costau, er mwyn cynllunio ar gyfer pontio i'r Pumed Cynulliad, ac i nodi'r newidiadau posibl i'r Siambr o fewn y rhaglen gyflawni.
- 5.3 Cyflwynir y strategaeth i'r Comisiwn ar 13 Chwefror ar gyfer cael ei gytundeb arni.
- 6.0 Cofnod y Trafodion
- 6.1 Cyflwynir ystyriaeth ar Gofnod y Trafodion, sef y fformat a'r newidiadau posibl i'r Cofnod, i'r Comisiwn ar 6 Mawrth. Bu'r Bwrdd Rheoli yn trafod yr agweddau allweddol a oedd yn cynnwys swm y gwaith golygu, y posibilrwydd ar gyfer newid, y goblygiadau o ran adnoddau a'r dechnoleg sydd ar gael.
- 6.2 Sefydlwyd gweithgor i ystyried y materion presennol, ac roedd y gweithgor wedi nodi rhai themâu allweddol, sef yr angen i wella'r broses; swm y gwaith golygu; y gallu i chwilio'r Cofnod ac i dynnu darnau ohono; a deall anghenion defnyddwyr. Roedd yr Aelodau hefyd wedi nodi'r angen am well swyddogaethau chwilio a chynhyrchu'r Cofnod yn gyflymach, gan ystyried dwyieithrwydd y Cofnod.
- 6.3 Cytunodd y Bwrdd y byddai'n ddefnyddiol ystyried barn seneddau eraill, a bod angen sicrhau bod penderfyniadau yn canolbwyntio ar y dyfodol, ar sail beth oedd nod y Cynulliad ar gyfer y 5 - 10 mlynedd nesaf. Dylai'r cynnig a gyflwynir i'r

Comisiwn amlinellu'r opsiynau a'r risgiau, er mwyn canfod a oes dymuniad i newid ai peidio.

6.4 Camau i'w cymryd:

- ail-edrych ar yr adolygiad annibynnol blaenorol i gael gwybodaeth gefndir ddefnyddiol i baratoi'r cynigion;
- nodi a oes data ar gael sy'n cymharu'r defnydd o'r Cofnod â Senedd TV ar hyn o bryd.

7.0 Y wybodaeth ddiweddaraf am Lywodraethu Gwybodaeth

7.1 Croesawyd Alison Rutherford i'r cyfarfod i gyflwyno'r cynnig diwygiedig ar gyfer y Cynllun Nodau Amddiffyn, a oedd wedi'i ddiweddarau o ganlyniad i sylwadau'r Bwrdd Rheoli.

7.2 Yn dilyn cael cadarnhad gan San Steffan y byddai eu cynllun newydd yno yn cynnwys nodi pob dogfen swyddogol ag un o nifer o lefelau, penderfynwyd mabwysiadu dull gweithredu syml o ddefnyddio un nod amddiffyn pan fo'n briodol.

7.3 Awgrymwyd y byddai'n ddefnyddiol darparu allwedd sy'n dangos nodau San Steffan i gynorthwyo staff wrth drin eu dogfennau.

7.4 Byddai'r cynnig yn cael ei rannu â'r Aelodau a byddai canllawiau'n cael eu darparu er mwyn nodi disgwyliad y Cynulliad o ran trin dogfennau. Byddai'r canllawiau a sesiynau gweithdy yn cael eu darparu i staff i godi ymwybyddiaeth o'r cynllun a sut i'w ddefnyddio.

7.5 Cafodd y Bwrdd y wybodaeth ddiweddaraf am amserlen gadw y Cynulliad, a oedd yn nodi'n fanwl am faint o amser y dylid cadw mathau o wybodaeth wahanol. Roedd amserlenni ar gyfer y meysydd gwasanaeth amrywiol yn cael eu hadolygu i sicrhau eu bod yn cydymffurfio ag arferion gorau ac egwyddorion diogelu data. Yna adolygir yr amserlen gyffredinol gyda Chyfarwyddiaeth y Gwasanaethau Cyfreithiol tua diwedd mis Chwefror.

8.0 Y wybodaeth ddiweddaraf am y Bwrdd Buddsoddi

- 8.1 Rhoddwyd y wybodaeth ddiweddaraf am gyfarfod diwethaf y Bwrdd Buddsoddi a gynhaliwyd ar 4 Chwefror. Roedd y contract copiŵyr wedi'i adolygu, a chytunwyd y dylid ystyried pob opsiwn posibl. Roedd adolygiad o'r gwariant ar ddiwedd y flwyddyn ariannol wedi nodi tanwariant a ragwelwyd o oddeutu £700,000, a byddai hwn yn cael ei ddychwelyd drwy gyllideb atodol.**
- 8.2 Roedd Dave Tosh ac Anna Daniels yn datblygu dull gweithredu o ran rheoli rhaglenni, a fyddai'n cael ei gyflwyno i'r Bwrdd Rheoli maes o law.**
- 8.3 Edrychodd y Bwrdd ar brosiectau a chynigion ar gyfer 2014-15.**
- 8.4 Cam i'w gymryd: Steven O'Donoghue i anfon y rhestr o brosiectau a chynigion sydd i ddod, i gael mewnbwn neu unrhyw ychwanegiadau gan y Bwrdd Rheoli.**

Cloi'r cyfarfod

9.0 Unrhyw fater arall

9.1 Cynhelir y cyfarfod nesaf ar 13 Chwefror 2014.